

FEDEA eta EKINTZA

Tarancón, berriz ere lehendakari

Martxoaren 3tik 7ra bitarteko astean, bere batzarrea egin du Madrilen Espainiako Apezpiku Kontseiluak Chamartingo bilkuretxean.

Batzarre honen lehen egitekoa hauteskundeak* ziren. Bai lehendakariari, bai honen ordezkariari eta bai batzordeetako* buru ziren gehientsuei hiru urtetako epea betetzen zitzaien, eta legezkoa zen karguberritzea. Baina, espero zen bezala, ez da aldaketarik izan. Lehengoek segitzen dute Espainiako Elizaren buru, Tarancón beraren gidaritzapean. Esan nahi da, beraz, Elizaren eraberritzeari dagokion alorrean, azken hiru urte hauetan eraman den bidetik joango direla apezpikuak, eta Elizaren eta Estatuaren arteko harremanetan ere berdín, hau da, hausterik eta haserterik gabe, bakoitzak bere alorrean askatasun osoz jokatu.

Azken urte hauetan seriooki jokatu dute apezpikuek, gure gaurko mundu honi kristau ihardespen* bat eman nahiz, eta Ebanjelioaren gizartearekiko erantzunkizunaz* oharteraziz. Ageri inportanteak eskaini dizkigute geure azterketarako, eta bidean dira beste bi guztiz inportanteak eta agian* —adiskidetzeari buruzko ageria batez ere— historiara pasatuko direnak.

Bide urratze bat izan da hiru urte hauetako lana. Lan gogorra batetik, eta kritikatu bestetik. Horregatik, beharrezkoa zen Apezpiku Kontseiluaren berronespena.* Eta, zorionez, berronespen hori lortua izan da erabat,* apezpiku gehienek jarraipenaren aldeko botua eman baitute (52 botu, hain zuzen), kontrako 22 botuak, bide kontserbakorrako baten izenean, Toledoko artzapezpiku González Martín jaunari eman dizkiotelarik.

«Kontrako eritzirik eta jarrera* ezberdinik ba dago apezpikuen artean —esan du Tarancón jaunak. Baina hori, gu gizonak garelarik, guztiz normala da; eta ez du esan nahi, gure artean batasun eta adiskidetasunik ez dagoenik». Hala uste dugu guk ere, eta hala nahi genuke, datozen hiru urte hauei begira. Haste ona eman diote oraingoz behintzat, «Adiskidetzearen Ageria» botutara jartzean, bizpahiruz besteek aldeko botua eman.

«Adiskidetzea Elizan eta gizartean»

Izenburu honekin argitara emango den ageri bat ari dira prestatzen Espainiako apezpikuak, Urte Sainduari begira.

Hortarako, bosteko batzorde bat izendatu zuten, agergai* bat molda zezan. Izen hauek osatzen zuten bosteko hori: González Martín, González Moralejo, Yanes, Montero eta Setien.

Agergai hori egina da jadanik,* eta azken batzarrean sekulako arrakasta* izan du apezpikuen artean. Gehienak eritzi bateko agertu ziren, dokumentuaren balioa argi eta garbi aitortuz: 65 botuemaletatik, 60 alde guti gorabehera. Komentatzaile batzuren ustez, botazioetako batasun hau Toledoko artzapezpiku González Martín jaunaren eraginari* zor omen zaio.

Hala ere, ageria ez da apirilaren erdialderarte argitara emango. Bien bitartean astia dute apezpikuek, nahi dituzketen zuzenketak proposatzeko.

Azken ageria orain artekoa baina laburragoa izango dela diote (32 horrialde), zehatzagoa, zorrotzagoa, ausartagoa,* gaurko giroari begira egina. Bost parte izango ditu: a) Sarrera: Urte Sainduari erantzuna. b) Jainkoaren asmoa: Gizarte anaikar eta baketsu bat. c) Egun-

go* errealitatea. d) Adiskidetzearen bideak. e) Apezpikuen jarrera.

Ondorio pozgarriak opa dizkiogu, benetan historikoa gerta daitekeen ageri honi, Espainiako gizarte eta Elizari aparteko zerbitzua eskaini diezaiekeela uste baitugu, egiazko bakeratze baten bidean.

«Iglesia-Mundo» aldizkariaren ofizialtasunik eza

Madrileko artzapezpikutegiko prentsa bulegoak* ohar bat argitara eman du, «Iglesia-Mundo» eskuindar aldizkariaren jokabidea gaitzetsiz.*

Fedearen batasuna eta eliz elkartasuna oinharri bezala jarri ondoren, aipatu* aldizkariak Tarancón kardinalaren eta Alberto Iniesta apezpiku laguntzailearen aurka egiten dituen salaketak gogoratzen ditu batez ere, zenbait argitasun emanez.

Ohar honek delako aldizkari horren ofizialtasun eza salatzen digu. «Delako aldizkariak —dio oharrak— ez du elizbarrutiko* baimenik; eta agertzen duen hitzezko oldarkortasuna* eta ematen duen informazioaren joera aski* dira, maiz* askotan elizbarrutiko jokabidearekin bat ez datorrela ikusteko. Ez dute, beraz, batasunaren alde lan egiten, aldizkari hori defendatzen eta zabaltzen dutenek». (Joan Joxe Iturriotz).

Helder Cámara Sorbonan

Pariseko Unibertsitateko «doctor honoris causa» egin dute Helder Cámara, Recifeko apezpikua.

Honekin batean, beste bost irakasle sonatu izan dira doktoratuak. Halegia,* Ernst Bloch, Tübingengo Unibertsitatekoa; Robert Braidwood, Chicagoko Unibertsitatekoa; Adam Schaff, Poloniako Zientzi Akademiakoa; Robert Solow, MITekoa (Massachusetts Institute of Technology), eta Leonid Kantorovich, Moskuko Unibertsitatekoa.

Gizon ospetsu hauk,* denak batean biltzea beti ere gertaera interesgarria da. Baina are* interesgarriago, Adam Schaff marxista poloniarren eta MITeko Robert Solow teknikari amerikarraren artean gure «apezpiku goria» ikustea.

Sariztatuen izenean, Helder Cámara mintzatu da. Oso gogor mintzatu ere. Ezker eskuin atakatu du, harmen arazoagatik eta sozietate multinazionalengatik Estatu Batuak eta Sobietar Batasuna salatuz.

Hirugarren Munduaren aldeko garrasi handi bat izan da mintzaldi osoa. Gure «jakintsuen» analisisetan ere ez da Helder Cámara fidatzen, Hirugarren Mundua aztertzean, nahi izan ez arren ere, gure mundu aberatsaren faboretan egin ohi direlako, Erromako Klub famatuak egin zuten bezala.

Zientzia errugaberik* ez dago. Ordinatoreak ez dira jatorrizko bekatu gabeak: mundu aberatsekoak dira. Haste gaitezen hastapenetik.* Unibertsitateak Bake Eskola Nagusi bilakatu* behar ditugu. Ametsari leku gehiago egin diezaigun! «Zoriontsuak amets egin ohi dutenak». «Jakintsu» horien artean, «beste mundu batetatik» etorritako mintzoa zirudien Helder Cámararenak. Gutierrez, Hirugarren Mundutik urregorritzko sala haietara etorritako boza! (Joanes Lekerika).

diezaieke, deiskioe
diezaigun, deiogun
digu, deusku
diote, deutsoe
dizkigute, deuskuez

dizkiogu, deusaguz
dizkiote, deutsoez
zaio, jako
zezan, eian
zitzaien, jaken